

Txirritola

ARAMAIO / Barikua / 2003ko uztailaren 11 / 72. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Udalaren funtzionamenduaren nondik norakoak zehaztu dituzte

U. M.

Abiarazi dute udal antolamendua: osoko bilkuren eta batzordeen ordutegiak eta egunak erabaki dituzte; horrez gainera, batzordeak eratu dituzte eta bestelako erakundeetako izendatzeak egin dituzte. Era berean, erabaki zuten eguaztenean (hilaren 9an) osoko bilkura egitea.

Joan den eguaztenean (hilak 2) egin zuten batzar hori. Hala, hartutako bestelako erabakien artean, zehaztu zuten abendura bitarteko osoko bilkurak orain arte moduan egingo dituztela: hilaren hirugarren eguaztenean, 18:00etan. Horrekin batera, erabaki zuten uztailean osoko bilkura bi egitea, uztailaren 9an eta 22an, atzeratuta dauden lanak egiten hasteko. Horren ostean, batzordeak eratu zituzten.

BATZORDEETAKO TALDEAK

Hala, Hirigintzako buru Roberto Aginagalde izendatu zuten, eta Jesus Agirre eta Patxi Aiasturi izango ditu batzordekide.

Zerbitzuburu Andres Osinaga izango da, eta Aitor Abarrategi eta Mertxe Mondragon izango ditu laguntzen.



Besteak beste, erabaki zuten, orain arte moduan, osoko bilkurak eguaztenean izango direla, 18:00etan.

Ogasun batzordeko buru, berriz, Patxi Untzueta izango da, eta Valentin Arriaranek eta Mertxe Mondragonek osatuko dute taldea.

Mendien batzordean Valen-

tin Arriaran izango da gidari, eta Patxi Untzueta eta Mertxe Mondragon laguntzaile.

Kulturan Jesus Agirre izendatu zuten buru, eta Mertxe Mondragon eta Jose Goronaeta izan-

go dira laguntzaile.

Azkenik, Euskara batzordean Jose Goronaeta izango da zuzendaria, eta Jesus Agirre eta Mertxe Mondragon izango dira laguntzaile.

Oraingo hilean osoko bilkura bi egitea erabaki dute, atzeratutako gauzak egiten hasteko

BESTELAKO IZENDATZEAK

Horrez gainera, Udalak ordezkariak izendatu zituzten. Honako hauek: Zuiako Koadrilan, Andres Osinaga eta Mertxe Mondragon; UEMAn, Jose Goronaeta; Gorbaiako Inguruak elkartean eta Urkiolako Parke Naturaleko Patronatuan, Valentin Arriaran; Eskolako Kontseiluan, Deba Garaiko Ospitalean eta Elkarkidetzako Kontrolean, Mertxe Mondragon; Arabarrin, Roberto Aginagalde; eta Vital Kutxan, Patxi Untzueta. Bukatzeko, Jesus Agirre alkateorde izendatu zuten.

AUZO ALKATEAK

Bestalde, jakinarazi zuten auzo-alkateak ere izendatu beharra dagoela. Baina, oporrak direla eta, erabaki zuten irailaren 17a ipintzea izendatze horiek egiteko epe-muga moduan.

Orixolen egindako lana Artium museoan ikusgai

U. M.


Perejaume izeneko artistak Orixol mendian egindako lana Artium museoan dago ikusgai. Artista katalanak pieza erraldoi bat egin zuen, eta Orixol mendiaren tontorrean ipini zuen; horren ostean, argazkiak atera zizkion.

Argazkiak eta pieza handi zuria, biak hala biak daude ikusgai Artium museoan. Hain zuzen ere, Perejaume artistaren *Retrotabula* erakusketan.

Esandako moduan, pieza erral-

doia egin, Orixolen tontorreraino eramane eta han ipini zuen, argazkiak ateratzeko. Helburua paisaia naturala eta museoa uztartzea izan da. Kontua da artista katalanak Gasteiztik gertu dauden mendiaren argazkiak ikusi zituela eta inguruko mendietatik zenbait ibilaldi egin zituela. Hala, bere ideia aurrera eramateko leku aproposena Orixol mendiaren tontorra zela erabaki zuen. Eta orain emaitza dago ikusgai Artium-en.

Baina, horrekin batera, esan beharra dago ekimenak zenbait herritarren haserrea piztu zuela, mendiari kalte egin diolakoan.



Urriaren 26ra arte egongo da ikusgai Perejaumeren erakusketak.

LABUR

Areto futboleko aste bukaerako emaitzak

Uztailaren 21etik 26ra arte, Erretiratuen Kultura Astea egingo dute Aramaion. Hala, besteak beste, uztailaren 23an txangoa egingo dute Arabako zenbait lekutara eta uztailaren 26an bazkaria egingo dute Aramaion. Hala, ekitaldi bi horietako edozeinetan parte hartu gura duten erretiratuek, alargunek eta pentsiodunek datorren eguaztenea, uztailaren 16a, baino lehen eman behar dute izena.

Uztaileko bigarren domekak agintzen duenez: San Kristobal

U.M.

Antzin-antzinako ohiturekin aurrera egin dute Uribarrikoek, eta beste urtebetez San Kristobal eguna ospatuko dute domekan. Eguedian hasi eta iluntzera arte izango da bai zerekin gozatu San Kristobalگو zelai ederretan. 25 bat lagun ibili dira dena antolatzen.

San Kristobal ermitan egingo duten mezarekin hasiko dira ospakizunak. Mezaren ostean, 13:00etan Lagun Artean dantza taldeak saioa egingo du; ondoren, Gau Alai taldeak bisitarien oinak dantzan ipiniko ditu erromerian, bazkaltzeko ordura arte. Bien bitartean, ogitartekoak, pintxoak eta salda hartzeko aukera izango da, Uribarriko Intxaurren elkartearen eskutik (jaiaren antolatzaileak).



TXIRRITOLA

Aramaioko eta inguruko jende ugari erakartzen du San Kristobal jaiak.

BOLO TXAPELKETA

Jaiaren antolatzaileetako batek, Angel López de Bergarak adierazi digunez, bazkal ostean, 17:45 inguruan, bolo-txapelketa izango da San Kristobalén. Edozeinek izango du parte hartzeko aukera, eta aurreneko hiru irabazleendako sariak eta guzti egongo dira: urdai-azpikoa, lehenengoarendako; solomoa, bigarrenarendako

eta gazta, hirugarrenarendako. Txapelketa kanporaketetara jokatuko dute. Gau Alai taldea ere inguruan ibiliko da arratsalde partean, 19:00ak arte.

ANTZINAKO JAI

Angel López de Bergarak esan digun moduan, jende asko era-

kartzen du San Kristobal jaiak, Aramaiokoa zein ingurukoa: Eskoriatza, Otxandio, Aretxabaleta... Aspaldiko ohitura dela kontatu digu, lehen astoa hartu eta etortzen zirela. Aurten ere, jendeari jaira joateko gomita egin dio, leku ederra delako San Kristobal. Ea bada, eguraldia lagun duten!



Amuarrainak harrapatzeko Arrantza Lehiaketa

Amuarrainak arrantzan egiteko aukera paregabea ematen du Oilgor Ehiza eta Arrantza elkar-teak urtero, eta aurten ere hala izango da. Bihar, zapatua, 09:00etan hasiko da aurtengo Arrantza Lehiaketa, eta 13:00etan bukatuko da. Tartean, parte hartuko duten arrantzale gazteek 200 bat amuarrain izango dituzte Aramaio errekan, ahal duenak arrantzan egiteko. Parte hartzea erraza da; kanabera hartu eta Ehiztari Txokoa eman beharra dago izena; gero, elkartekoek esango diete non ipini amua botatzeko, eta hortik aurrera, norberaren abileziak aginduko du. Jakina, zeinek amuarrain handiena harrapatu, hark irabaziko du. Edozelan ere, esan beharra dago sari mordo banatuko dituztela antolatzaileek, ia parte hartzaile guztiendako egongo da zerbait.

Udalbatza berriaren aurreneko batzar arrunta

U.M.

Hasi da berriro ere Udala ohiko lana egiten eta atzeratutakoak eguneratzen. Horren adibide oraingo astean egin duten osoko bilkura. Gai mordo zituzten zerrendan, besteak beste, itxi berri dituzten gazte lokalak, Oletako lanak, **Berria** egunkaria eta Hirigintzako gaiak.

Hemendik aurrera kultura etxeko gazte lokalekin zer gertatuko den zehaztu beharra zuten eguazteneko batzarrean. Horrez gainera, Oletako errepidearen zabaltearekin lotutako gaia landu zuten, **Berria** egunkariaren akzioak erostea edo diru laguntzaren bat ematea aztertu zuten, eta Javier Uribarrenek Udalarari emandako


plaka batengatik esker ona azaldu zuten udalbatzarrera osatzen duten EAJ-EA koalizioako kideek.

Horrez gainera, abere ustiapenekin lotutako etxebizitzak erakitzea arautzen duen ordenantzari behin betiko onespina eman beharra zioten, eta herriaren sarrean eraiki behar zituzte adosatutak berbagai izan zituzten. Bukatzeko, bestelako gaien artean, Udalaren egoera ekonomikoaren berri eman zioten udalbatza berriari.

BI ASTE BARRU BESTE BAT

Edozelan ere, albiste hau idaztean batzarrera egin barik zegoenez, ez dakigu zein erabaki hartu dituzten zinegotziek.

Era berean, gogoratu beharra dago uztailearen 22an beste batzar bat egitea erabaki zutela, oporretara joan baino lehen.



U.M.

Lokalak direla-eta, gazteak kexu dira gertatzen dabilenarekin.

Pilota jaialdia bihar, zapatua, kiroldegian

U.M.

San Kristobal egunaren bezpera dela-eta, Barea elkar-teak pilota jaialdia antolatu du. Bihar, zapatua, izango da, 22:15ean hasita. Lehenengo herrikoek jokatuko dute, eta gero, kanpokoek. Besteak beste, Elgetan jokatu den Lau t'erdiko sariketako txapelkunak jokatuko du.

Esandako moduan, aramaioren txanda izango da lehenengo. Alebin eta infantil mailakoen artean bikotea osatu eta honakoek jokatuko dute: Igorrek eta Markelek Xabiren eta Inakiren kontra.

Horren ostean, gazte mailakoen partiduak etorriko dira. Hala, Olazabal eta Betelu leitzarrek Axpe (Bedoña) eta Herrarte (Eskoriatza) Gipuzkoako txapelkunak izango dituzte aurrez aurre.

Eta, bukatzeko, Elgetan jokatutako den ETBko Lau t'erdiko txapelketako jokalaririk biren arteko partidua izango da. Sorarrain (Alkiza) buruz buru arituko da Mintegiren (Lizartza) kontra.


Ikusten den moduan, beraz, partidu interesgarriak eta maila handikoak izango dira bihar gauean Aramaion.

BIHOTZA ETA ETXEA, ARAMAION

Barea elkar-teak antolatu ditu partiduok. Taldeko arduradun Enrike Axpek kontatu digun moduan, lehen, Aramaioko jaien ostean edo amaiera aldean beti egiten zuten halako pilota jaialdiren bat. Edozelan ere, azkenean bi urteotan ez dute ezer egin. Horren aurrean, aurten, egoerari buelta eman eta partiduak antolatzea erabaki zuten. Besteak beste, Aramaion pilotarekiko dagoen zaletasunari eusteko eta San Kristobal bezpera dela gogora ekartzeko.



Herriko gazteenak laster asko girotu ziren jaietz gozatzeko.



Sakre taldea pozik geratu da barikuko kontzertuarekin.



Gatibu taldeak jende gazte ugari erakarri zuen Aramaioko plazara.



Etxafuegoa nora joango zen beldurrarekin bota zuten txupinazoa.

Herritarrak gustura ibili dira aurtengo San Martin jaietan

Gustura geratu dira herritarrak aurtengo San Martin jaietan. Hasteko eta behin, barikuko kontzertuek jende gazte ugari erakarri zutela esan beharra dago. Batek baino gehiagok honakoa zioen: "Ez dakizu zein beteta egon zen plaza barikuan! Baina bete-beteta! Eta gero, tabernetan ere ia sartu

ezinda ibili ginen". Argi dago hori zein garrantzitsua den herriarendako. Horrez gainera, herriko Sakre taldeak bere musika taula gainean erakusteko aukera izan zuen.

Zapatuan, berriz, gustu guztietarako ekitaldietan parte hartzeko aukera izan zuten aramaiarrek: kirolak, antzerkia, karta-

jokoak, Olinpiadak... Domekan ere ez zen jenderik falta izan jaietako ekitaldietan. Are gehiago, zenbaitzuen esanetan, Arrasateko Sanjuanetan baino jende gehiago ibili da Aramaion. Eta astelehenean, duda barik, udal-txepetan egin zuten herri afariak erakarri zuen aramaiar gehien Herriko Plazara: 100 lagun-edo.

Bukatzean, ezin ahaztu barik utzi Jai batzordea. Jaiak antolatzen aurre-lan handia egin zuela jakinarazi genuen, bai; baina kontua da jaietan bertan ere lanean ibili zela batzordea osatzen duen laukotea buru-belarri guztia ondo atara zedin zaintzen.

ARGAZKIAK:
ITSASO LOPEZ DE BERGARA

Jaietan bertan ere lanean ibili zen batzordea, guztia ondo atara zedin zaintzen



UMEAK IBILI ETA IBILI Ez zuten ez aspertzeko astirik izan gazteenek! Barikuan Sebastopoleko Titiriteroen musika zaratatsuarekin eta magia ikuskizunarekin hasi, eta astelehenera arte makina bat ekinaldi egin dituzte dantzan, pailazoekin barrezka, txotxongiloei aho zabalik begira, haur parkean puzgarri artean eta margolanak eta bestelakoak egiten... Era berean, zirku lantegietan euren abileziak eta oreka erakusteko aukera izan zuten. Jakina, gurasoak ere pozik, umeak ondo zebiltzala-eta.



PAPARGORRI, FIN-FIN Aretoa bete-beteta egon zen Papargorri gazte abesbatzaren saioa entzuteko. Eta, ordu erdiko saioaren ostean, benetan gustura geratu ziren herrikideak kultura etxean entzundakoarekin. Papargorrikoek ondo bete zuten lana, eta abesti alaiak eta *martxosoak* kantatu zituzten. Bitxikeria moduan, esan beharra dago mutiko bakarra igo zela taula gainera neska guztien artean; hortaz, eta abesbatzaren arrakasta ikusita, ea besteren bat animatzen den! Segi aurrera, gazteak!



LAUKOTE TXAPELDUNA Bertso saio polita eta luxuzkoa ikusteko eta entzuteko aukera izan zen domekan. Euskal Herriko lau txapeldunak taula gainean batu, eta Andere Arriolabengoa aramaiarren esanetara ibili ziren bertsotarako abilezia erakusten. Asier Otamendi arabarra, Igor Elortza bizkaitarra, Aitor Mendiluze gipuzkoarra eta Amets Arzalluz nafarra ibili ziren nor baino nor gehiago. San Ferminak, Beckham, Fidel Castro eta horrelako gaiak erabili zituzten bertsotan egiteko.



Galiziako ohiturek ere izan zuten lekutxo Aramaion.



Herriko artista gazteek Arrasate Musikalen ikasitakoa erakutsi zuten.



Hotzari beldurrik ez, eta pozik ibili ziren umeak mangeraren ur zorrotadaren aurrean.



Fardo jaurtiketa moduko herri kirolak erakutsi zituzten Betagarri taldekoek.